

Fründe vun der Akademie för uns kölsche Sproch e. V.



fründe

**aktuell**

Leev Fründe,

dat eeschte Veedeljohr es meddlerwiel och ald widder eröm. Wie ich jo Weihnachte gesaht han, es nix mih wie et wor, esu es et immer noch. Keiner kann maache, wat hä well. Su süht dat em Momang us.

Ävver mer dürfe dä Kopp nit hänge looße un ich ben mer secher, dat dä Zostand kein Iwigkeit mih duure kann un dann könne mer alles nohholle, wat mer bes jetz versüümp han. Do freue mer uns doch all drop.

Wat gitt es Neues ov Aales vum Verein?

Vill kann ich Üch leider nit verzälle, et es jo nix loss - ävver

zick Aanfang vum Johr gratuleert uns 2. Vörsitzende, et Sabine Richrath-Strunk, de Gebootsdagskinder vun unsem Verein met ner schöne Gebootsdagskaat un e paar hätzliche Wööd dobei. Die Resonanz dodrop es ärg god, wat uns natörlich och freue deit.

Et wör schön, wann mer vun Üch der ein ov andere Vörschlag för Wanderunge oder Föhrunge krigge künnte.

Subaal dat widder mügelich es, weede mer uns noch ens opmaache, öm dä KölnPfad zo erkunde.

Dä Bereech em Kölsch Magazin „Klaaf“ vum Februar üvver uns Theaterschmölzche han ärg vill Lück gelese. 2 Fraulück han sich gemeldt un han sich interesseert gezeig för metzospille. Och e paar Mannslück künnten unsem Theaterschmölzche noch ganz god dun. Vileich fing sich jo der Ein ov Andere.....

Leider müsse mer widder vun nem langjöhrlige Metgheed  
Avscheidung nemme.

Alfons Everz es am 1. April 2014 unsem Verein beigetrodde. Hä  
hät sich för vill Saache interesseert un hät och die Aangebodde  
vun de Schmölzcher gään angenomme. Aafangs wor hä noch off  
mem Rolf Decker un singer Wandergrupp ungerwähs. E paar Johr  
lang hät hä och em Theaterschmölzche metgespillt. Ävver bes zu  
singem Dud wor hä Metgheed em Chor.

Alfons hät sich ävver och för die Belange vum Verein engezet.  
Zweimol es hä zom Kasseprüfer gewählt woode, su och för die  
disjöhrlige Prüfung. Och för die KölnPfadwanderung hat hä schon  
sing Ungerstötzung zogesagt.

Uns bliev die Erennerung an Alfons met singem FC-Schal. Alfons  
es am 20. Febr. 2021 plötzlich un unverhoff gestorve. Mer danke  
im för singe Einsatz un weede sing Aandenke en Ihr halde.

Singer Famillich, besonders singer Ihfrau Dorothea und seinem  
Sohn spreche mer unser ihrlich Metgeföhl us.

### *Heimweh nach Köln vum Willi Ostermann*

*Un deit der Herrgott mich ens rofe,  
dem Petrus sagen ich als dann:  
„Ich kann et rauhig dir verzälle,  
dat Sehnsucht ich noh Kölle han.“*

*Un luuren ich vum Himmelspöözge  
Dereins he op ming Vatterstadt.  
Well stell ich noch dobove sage,  
wie gähn ich dich, mie Kölle hatt.*

Leev Fründinne un Fründe, ne kleine Bereech vum Kölsch Klaaf Schmölzche

Doch zoesch möch ich jet klorstelle, manche schrieven uns aan met :

„An die Klaafsprecher“, doch jode Kölsche wesse, dat Klaaf „ spreche, verzälle“, bedüick, Also nennen se uns „ Sprechsprecher !“ No jo, mer kann och nit alles wesse.

All dat wat mer uns zo Weihnachten gewünscht han, es nit jekumme. Corona hätt uns noch immer em Greff.

Keine Besök en de Hüüser vun dä Seniore. Nix met „en der Ärm nemme“ no all denne ville Monate, un ens fass dröcke.

Jeden Daach hööt mer vum „Lockdown“, „Shutdown“, vun huhe un fallende Inzidenzzahle. Nä wat sin mer en der Zweschezick perfekt en englisch jewode. All dat neue, fings de nit immer em „neuen Sprachschatz“, wann hä schon e paar Jöhrcher älter es.

Wat bliev uns üvrig, mer schrieve selvs jet, un lese laut, domet och de Stemm geölt bliev, dun wigger en dänne schöne Böcher met unserer Muttersproch lese, un waade, dat et widder loss jeiht,.

Ävver blos setze un nix dunn, es och nit schön.-

Doherr kom dat Kölsch Klaaf Schmölzche op die Idee, loss mer doch ens versöke jet zo maache, dat die Lückcher uns nit nur höre, sondern och sinn künne, Denn beim Zohöre schlofen se off schnell en, dat wor uns vun de Leiter oder Leiterinnen der Heime jesaat.

Mer hatten dänne Häre un Mamsellcher en de Hüüser versproche :  
„Mer losse üch nit allein, un och ets räch nit, dun mer üch verjesse“.

Jesaat , jedonn, et woot e Projamm jekauf för DVD's zo bespille. Dä Dieter hat et Rejall üvvernemme.

Un su kunnte mer passend zur Fastelovendszick, ne decke Püngel DVD's un USB Sticks met schöne Verzällcher un Musikbegleitung - die se all metsingen kunnte - widder ens **v e r s c h e n k e !!!**

Dat wor dann fass esu schön, wie dä herrliche Zoch vum Hänneschen en der Äugelskess.

Jo un jetz heiß et widder, avwade wat kütt ! Doch zoesch „ Frohe Ostern ! “

*Wünscht Üch      Marlies Marks*

*Unjedold vum Fritz Häck*

*Jras, noch jet jrau, kütt lantsam durch,  
Et Schneifeld hät en schmale Furch.  
E Blömche fängk aan sich ze strecke,  
Fifaldere Daudröppcher lecke.*

*De Sonn kritt pö a pö neu Kraff.  
Reck dat, dat se der Winter schaff?  
Ov dat dann wirklich Fröhling ess?  
Jedold, dat ess noch nit gewess!*



Mer wünsche Üch en gesunde Fröhjohrszig und e glücklich  
Pooschfess met der Hoffnung op en schöne Zigg noh Corona.

Hätzliche Größ

Üüre Vörstand

Josephine Feldmann, Sabine Richrath-Strunk,

Robert Schmelter, Udo Giesen